

佛說八大人覺經講義 (七)

寬如合撰

經云：「少欲知足，是人能入聖賢之道，何以故？惡道衆生，經無量劫，闕衣乏食，叫喚號毒，飢寒切楚，皮骨相連，我今暫闕，未足爲苦。是故智者，貴法賤身，勤求至道，不顧形命，」如醒世詩云：「堪歎人心毒似蛇，誰知天道轉如車，去年妄取東隣物，今日還歸北舍家，分外錢財湯潑雪，騙來田地水堆沙，若將狡譎爲生計，恰似朝開暮落花。」豈知世事如幻夢，韶華似水漚，一氣不存，遂成永別，迷聲醉色，貪多務得者，盡失人身，名聞利養，無非地獄深根，智者觀之，浮生若夢，水月鏡花，何足顧戀，若因此內貪外求，心無厭倦，必定忘失道業，錯過人身，自取沈淪，如蛾赴火，自燒自爛，從苦入苦，何有已時，罪惡日深，猶如下海，故云：「心無厭足，惟得多求，增長罪惡。」

「菩薩不爾，常念知足，安貧守道，惟慧是業」者，此示對治之方，療病之法藥。「菩薩」者，具云菩提薩埵，此翻爲覺有情，發大乘意，覺大乘道，以自覺之道，覺於有情衆生，故云「覺有情」。又名大道心衆生，其中亦有三種差別：一，凡夫菩薩，雖是凡夫，聞大乘教理，起大乘行，發四弘誓願，廣學利生方便。二，菩薩菩薩，行菩薩行，入菩薩位，分破無明，分見法身，運無緣慈，普濟一切，位在別教初地，圓教初住以去，等覺以還，故名菩薩。三，佛菩薩，已圓妙覺，帶果行因，倒駕慈航，隨流九界，隨類逐形，教化衆生，如觀音文殊等是。

「不爾」者，不者否也；爾者，詞之必然也，意謂不如此也。菩薩捨己從人，利他爲先，豈有惡求多求之舉，故曰「菩薩不爾」，佛遺教經曰：「汝等若欲脫諸苦惱，當觀知足，知足之法，即是富樂安隱之處，知足之人，雖臥地上，猶爲安樂，不知足者，雖處天堂，猶不稱意，不知足者，雖富而貧，知足之人，雖貧而富，不知足者，常爲五欲所牽，爲知足者之可憐愍」，學道

者，應常如是體念知止知足，不作無厭之求，故曰「常念知足」。

「安貧守道，唯慧是業」，明不獨富而知足，不肯多求，人雖窮而志不窮，不因貧而自棄，堅守菩提覺道，而不退屈，所謂窮且益堅，不墮成佛之志也，俱舍論云：「道義云何？謂涅槃路，乘此能往涅槃城。」此道能通至佛果，故名道。既安貧而守道，則志趣菩提；志趣菩提，則非智慧不爲功，故無他求，唯智慧所修行業，故曰「唯慧是業」。達無爲空理，而行諸善行，於善而不住者，名爲「慧業」。今此菩薩，既不多求惡求，則罪障消除，知足安貧，則妄求息，而業障除，守道慧業，則妄想澄，而惑障滅，惑業之因淨盡，苦報之果寂然，菩提覺道，朗然通達，更無紆曲矣。龐居士云：「智者觀財色，了知是幻虛，衣食支身命，相勸學如如，時至移菴去，無物可盈餘」。觀諸經論，行者皆以五欲爲障道本，若不斷除，無由證聖，當以唯慧是業，方可斷除，探其根源，畧有三種：一、自內五根，二、外緣五塵，三、所生五識，根塵識三，能生染着，故涅槃云：「善男子，譬如惡象，心未調順，有人乘之，不隨意去，遠離城邑，至空曠處；不善攝此五根者，亦復如是，將人遠離涅槃城邑，至於生死曠野之處。善男子，譬如佞臣教王作惡，五根佞臣，亦復如是，常教衆生，造無量惡。譬如惡子，不受師長，父母教救，則無惡不造，不調五根，亦復如是，不受師長善言教救，則無惡不造。善男子，凡夫之人，不攝五根，常爲地獄、畜生、餓鬼之所殺害。亦如惡賊，害及善人」。是故智者，應當收攝五根，三業隨智，不爲五塵所惑，漸可轉識成智，與道相應，故菩薩常念知足，則能安貧，心無希取，唯慧是業，破諸魔軍也。遺教經云：「五根賊禍，殃及累世，爲害甚重，不可不慎，是故智者，制而不隨，持之如賊，假令縱之，皆亦不久見其磨滅」。又如古德云：「日防夜

防，家賊難防，識得故不爲害也」。若無智慧，如何識得不受其害耶？故當以「唯慧是業」。

按第一覺結文應曰「如是觀察，漸離生死」。若能如是觀察，則知心無厭足，惡求多求，作罪招愆。知足安貧，則身心安樂，當無非份貪求，何有諍訟。民生康樂，家國安寧，卽爲家庭社會教育之基。進而修慧，則廣學多才，入世足以利生，出世堪以修道，從戒定慧三無漏學，以遊菩提妙路，卽是漸離生死之方便，從此觀行位中，進菩提之覺法也，第三覺法已釋竟。

丙四，覺知常行精進去懈怠。第四覺知，懈怠墮落，常行精進，破煩惱惡，摧伏四魔，出陰界獄。

上示少欲知足，正希其節省貪欲，食精蓄銳，以辦出世大事。若假知足以偷安，因循懈怠；貽誤終身，則墮落難翻。故更以精進勸之。

「第四覺知，懈怠墮落」者，此第四種覺法，應知懈怠倦怠，則身心放逸，爲墮落之由，此出懈怠之過，是衆生病咎；惑業增長，生死輪迴，何日可了。遺教經云：「行者之心，數數懈廢。譬如鑽火，未熱而熄，雖欲得火，火難可得」。清凉疏云：「約三慧以辨懈怠，聞則聽習，數息，聖道不生」。懈怠之過，豈細小哉！菩薩本行經曰：「夫懈怠者，衆行之累，居家懈怠者，則衣食不供，產業不舉。出家懈怠者，則不能出離生死之苦」。生死不能出離，焉有不墮落者哉？古人云：「求學者如逆水行舟，不進則退，」旨哉斯言也，如龐居士云：「一日復一日，百年漸漸畢，急急除妄想，無念成眞佛，更莫苦攀緣，窺他世上物，忽然無常至，累劫出不得」。此皆明懈怠之過，能招墮落之果，應除之病咎。

「常行精進」之下，示對治之方，療病之法藥。

「常行」者，畢生無間無退也，專一不雜曰「精」，急起直追曰「進」。當知如來所說法門無量，總之八萬四千，一一應機施教，門門俱可證眞。若一門深入，事專而道易成，若今日參禪，明日聽教，忽爾念佛，忽而持咒，東摸西索，至老無成，當知教法雖多，貴在純一。如參禪則當悟理起修，自有相應一日。念

佛則當眞信，切願實行，念茲在茲，不遺不失。常勤精進，則道業易成。故遺教經云：「若勤精進，則事無難，是故汝等，當勤精進。譬如小水長流，則能穿石」。起信論云：「於諸善事，心不懈怠」。當於一切時，一切處，所有衆善，隨己堪能，不捨修學，故曰：「常行精進」。

「破煩惱惡，摧伏四魔」者，是明精進之功能。破者，破除煩惱如賊，智慧如劍。如淨名云：「以智慧劍，破煩惱賊」。又云：「譬如勝怨，乃可爲勇」。金光明經云：「以智慧刀，裂煩惱網」。所謂煩惱者，紛紛之法，惱亂於自心也。按佛頂經明十二類生，各各互具八萬四千煩惱，顛倒亂想，然大數有三：一、見思，二、塵沙，三、無明。破時從粗至細，由見惑着手，憤身口意，不隨十使流轉，貪嗔痴我慢疑名五鈍使，身邊戒見邪，名五利使。此十使攝盡八十八使，三界十使盡則見惑盡，見惑盡方見諦理，證初果。思惑具七十一品，斷盡方證四果，二、塵沙煩惱，塵沙障夫化道，至圓十信位，方斷盡。三、無明煩惱，圓初住別初地，斷一分無明，證一分法身，至圓妙覺，斷盡四十二品無明，方成佛道，必須三惑圓淨，方名究竟，圓破煩惱惡也。「摧伏四魔」者，既能破惡，卽能恐怖魔王，令其降伏而摧破之。梵語具云魔羅，此云殺者。謂能殺慧命，損法身，壞道法，傷功德，故名爲魔。

「摧」者摧毀，「伏」者降伏，如唯識論謂「披甲精進」也。精進爲能摧，四魔爲所摧。

「四魔」者：一、煩惱魔，卽三惑煩惱，能害法身故。二、五陰魔，又名五衆陰，五陰魔能傷慧命故。三、生死魔，能斷衆生命根故。四、天魔，卽欲界大自在天魔王，能障人障法故。今言「摧伏」者，因厭離生死劇苦，欽羨涅槃極樂，愍己憐他，欲共至菩提，勇敢堅決，與四魔戰，立大功勳，滅三毒，出三界。裂魔網，超生死，共成佛，度衆生。如起信論明。難壞精進，謂「立志堅純，遠離怯弱」。寶藏論云：「決悟者，不顧其疲，決戰者，不顧其死，決學者不顧其身，決道者，不重其事」。此其難壞相也如此。

(未完)